



An Bhruiséil, 10.5.2022
COM(2022) 201 final

2022/0143 (BUD)

Togra le haghaidh

CINNEADH Ó PHARLAIMINT NA hEORPA AGUS ÓN gCOMHAIRLE

**maidir le slógadh an Chiste Eorpaigh um Choigeartú don Domhandú d'Oibríthe
Iomarcacha tar éis iarratas ón bhFrainc – EGF/2022/001 FR/Air France**

MEABHRÁN MÍNIÚCHÁIN

COMHTHÉACS AN TOGRA

1. Na rialacha is infheidhme maidir le ranníocaíochtaí airgeadais ón gCiste Eorpach um Choigeartú don Domhandú d'Oibrithe Iomarcacha (CED), is rialacha iad a leagtar síos i Rialachán (AE) 2021/691 ó Pharlaimint na hEorpa agus ón gComhairle an 28 Aibreán 2021 maidir leis an gCiste Eorpach um Choigeartú don Domhandú d'Oibrithe Iomarcacha agus lena n-aisghairtear Rialachán (AE) Uimh. 1309/2013¹ (dá ngairtear Rialachán CED anseo feasta).
2. Tar éis iomarcaíochtaí a theacht chun cinn in Air France² sa Fhrainc, chuir an Fhrainc iarratas EGF/2022/001 FR/Air France ar ranníocaíocht airgeadais ó CED isteach an 21 Eanáir 2022.
3. Tar éis dó measúnú a dhéanamh ar an iarratas sin, tháinig an Coimisiún ar an gconclúid, i gcomhréir leis na forálacha uile is infheidhme i Rialachán CED, gur comhlíonadh na coinníollacha maidir le ranníocaíocht airgeadais a dhámhachtain ó CED.

ACHOIMRE AR AN IARRATAS

Iarratas ar CED	EGF/2022/001 FR/Air France
Ballstát	an Fhrainc
Na réigiúin is mó lena mbaineann (Leibhéal 2 NUTS ³)	Île de France (FR10) ⁴
An dáta a cuireadh an t-iarratas isteach	an 21 Eanáir 2022
An dáta a admháiodh go bhfuarthas an t-iarratas	an 21 Eanáir 2022
An dáta a iarradh faisnéis bhreise	an 4 Feabhra 2022
An sprioc-am leis an bhfaisnéis bhreise a sholáthar	an 25 Feabhra 2022
An sprioc-am leis an measúnú a chur i gcrích	an 12 Bealtaine 2022
An critéar idirghabhála	Airteagal 4(2)(a) de Rialachán CED
An príomhfhiontar	Air France
An líon fiontar lena mbaineann	3
An earnáil/na hearnálacha lena mbaineann an	Rannán 33 (Deisiú agus suiteáil)

¹ IO L 153, 3.5.2021, lch. 48.

² Tharla na hiomarcaíochtaí in Air France agus in dhá cheann dá fochuideachtaí, Hop agus Hop training.

³ Rialachán Tarmhligthe (AE) 2019/1755 ón gCoimisiún an 8 Lúnasa 2019 lena leasaítear na hlarscríbhinní a ghabhann le Rialachán (CE) Uimh. 1059/2003 ó Pharlaimint na hEorpa agus ón gComhairle maidir le bunú aicmiú coiteann na n-aonad críche maidir le staidreamh (NUTS). IO L 270, 24.10.2019, lgh. 1–56.

⁴ Is iad seo a leanas na réigiúin eile lena mbaineann: Alsace (FRF1), Aquitaine (FRI1), Auvergne (FRK1), Bretagne (FRH0), Corse (FRM0), Languedoc Roussillon (FRJ1), Midi Pyrénées (FRJ2), Nord Pas de Calais (FRE1), Pays de la Loire (FRG0), Provence Alpes Côte d'Azur (FRL0), Rhône Alpes (FRK2), Guadeloupe (FRY1), Martinique (FRY2), Guyane (FRY3) agus La Réunion (FRY4).

ghníomhaíocht eacnamaíoch (Rannán NACE Athbhreithniú 2) ⁵	innealra agus trealamh) Rannán 51 (Aeriompar)
An tréimhse thagartha (4 mhí):	an 1 Iúil 2021 – an 1 Samhain 2021
An líon iomarcaíochtaí le linn na tréimhse thagartha (a)	282
An líon iomarcaíochtaí roimh an tréimhse thagartha nó ina diaidh (b)	1 298
An líon iomlán iomarcaíochtaí (a + b)	1 580
An líon iomlán tairbhíthe incháilithe	1 580
An líon iomlán tairbhíthe ar a bhfuiltear ag díriú	1 580
An buiséad i gcomhair seirbhísí pearsantaithe (EUR)	20 873 656
An buiséad chun CED a chur chun feidhme ⁶ (EUR)	0
Buiséad iomlán (EUR)	20 873 656
Ranníocaíocht ó CED (85 %) (EUR)	17 742 607

MEASÚNÚ AR AN IARRATAS

Nós imeachta

- Chuir an Fhrainc an t-iarratas EGF/2022/001 FR/Air France isteach an 21 Eanáir 2022, faoi cheann 12 sheachtain ón dáta a comhlíonadh na critéir idirghabhála a leagtar amach in Airteagal 4 den Rialachán maidir le CED. D’admhaigh an Coimisiún go bhfuarthas an t-iarratas ar an dáta céanna, agus, an 4 Feabhra 2022, d’iarr sé ar an bhFrainc faisnéis bhreise a sholáthar. Soláthraíodh an fhaisnéis bhreise sin laistigh de 15 lá oibre ón tráth a iarradh í. An sprioc-am 50 lá oibre ón tráth a fuarthas an t-iarratas comhlánaithe, tréimhse ar lena linn ba cheart don Choimisiún críoch a chur leis an measúnú ar chomhlíontacht an iarratais leis na coinníollacha maidir le ranníocaíocht airgeadais a sholáthar, is sprioc-am é a rachaidh in éag an 12 Bealtaine 2022.

Incháilitheacht an iarratais

Na fiontair agus na tairbhíthe lena mbaineann

- Baineann an t-iarratas le 282 oibrí iomarcach a bhfuil deireadh tagtha lena ngníomhaíocht in Air France. Bíonn an fiontar ag obair san earnáil eacnamaíoch a aicmítear faoi rannán 51 NACE Athbhreithniú 2 (Aeriompar). Tá na hiomarcaíochtaí in Air France lonnaithe in 12 réigiún Fhrancacha de chuid leibhéal 2 NUTS ar mhórthír na Fraince⁷ agus in 4 réigiún Fhrancacha de chuid leibhéal 2 NUTS 2 thar lear⁸.

⁵ IO L 393, 30.12.2006, lch. 1.

⁶ I gcomhréir leis an gcúigiú mír d’Airteagal 7 de Rialachán (AE) 2021/691.

⁷ Île de France (FR10), Nord Pas de Calais (FRE1), Alsace (FRF1), Pays de la Loire (FRG0), Bretagne (FRH0), Aquitaine (FRI1), Languedoc Roussillon (FRJ1), Midi Pyrénées (FRJ2), Auvergne (FRK1), Rhône Alpes (FRK2), Provence Alpes Côte d’Azur (FRL0) agus Corse (FRM0).

⁸ Guadeloupe (FRY1), Martinique (FRY2), Guyane (FRY3) agus La Réunion (FRY4)

Critéir idirghabhála

6. Chuir an Fhrainc an t-iarratas isteach faoi na critéir idirghabhála in Airteagal 4(2)(a) de Rialachán CED, lena gceanglaítear go dtarlódh scor do ghníomhaíocht 200 oibrí iomarcacha ar a laghad le linn tréimhse thagartha 4 mhí i bhfiontar atá lonnaithe i mBallstát, lena n-áirítear oibrithe iomarcacha i soláthraithe agus i dtáirgeoirí iartheachtacha agus/nó daoine féinfhostaithe a ar tharla scor dá ngníomhaíocht.
7. An tréimhse thagartha 4 mhí atá leis an iarratas, is tréimhse í a mhaireann ón 1 Iúil 2021 go dtí an 1 Samhain 2021. Bhí 282 oibrí iomarcacha in Air France le linn na tréimhse tagartha.

Iomarcaíochtaí agus scor na gníomhaíochta a ríomh

8. Rinneadh scor ghníomhaíochtaí na 282 oibrí iomarcacha le linn na tréimhse tagartha a ríomh ó dháta an fhógra aonair ón bhfostóir lenar cuireadh in iúl go raibh an t-oibrí le leagan as nó go raibh conradh fostaíochta an oibrí le foirceannadh.

Tairbhíthe incháilithe

9. I dteannta na n-oibrithe a ndearnadh tagairt dóibh cheana féin, áirítear leis na tairbhíthe incháilithe 1 298 n-oibrí iomarcacha ar cuireadh scor gníomhaíochta orthu roimh an tréimhse thagartha 4 mhí nó tar éis sin. Chuir na hoibrithe sin uile deireadh lena ngníomhaíocht laistigh de na 6 mhí roimh thús na tréimhse tagartha an 1 Iúil 2021 agus/nó idir deireadh na tréimhse tagartha agus an lá roimh ghlacadh an togra seo. Is féidir nasc cúisíoch soiléir a dhéanamh leis an teagmhas ba chúis le scor gníomhaíochta na n-oibrithe iomarcacha le linn na tréimhse tagartha
10. Is é 1 580 duine an líon iomlán tairbhíthe incháilithe.

Tuairisc ar na teagmhais as ar eascair an iomarcaíochta agus scor na gníomhaíochta

11. Na heachtraí as ar tháinig na hiomarcaíochtaí sin, is toradh iad ar an ngéarchéim eacnamaíoch dhomhanda gan choinne a d'eascair as an bpaindéim. Chuir an ghéarchéim COVID-19 isteach go dian agus go tobann ar Air France mar aon aerlíne eile, rud a chuir iallach air a thairiscint eitilte a laghdú mar gheall ar dhúnadh na dteorainneacha agus an titim san aerthaisteal.
12. Chomh maith leis an laghdú mór ar ioncam agus ar thrácht, lenar bhain gluaiseachtaí gur bheag nárbh ann dóibh ag tús na paindéime, tá COVID-19 ina chúis le géarchéim fhadtéarmach san aeriompar. Tháinig laghdú 8 % ar OTI na Fraince in 202⁹ agus d'ainneoin gur tháinig méadú 7 % air in 2021, níl sé ar an leibhéal a bhí ann roimh an bpaindéim go fóill. An titim san ioncam teaghlaigh atá ar fáil ag daoine, tá tionchar aige sin ar chaiteachas taistil. Thairis sin, leis an teilea-obair agus na riachtanais nua sláinte agus chomhshaoil, tá ceistiú á dhéanamh ar an gcaidreamh leis an aeriompar, rud a d'fhéadfadh athrú a dhéanamh ar iompar an chustaiméara san fhadtéarma. Dá bhrí sin, meastar go mbeidh téarnamh an aeriompair mall agus éiginnte. Meastar nach mbainfidh Air France 95 % dá thairiscint eitilte a bhí ann roimh an bpaindéim amach ach go dtí 2023.
13. Ag tús na géarchéime, bhí Air France ag cailleadh EUR 450 milliún de shreabhadh airgid gach mí. Bheadh an fiontar dócmhainneach agus ní bheadh sé in ann tuarastail a íoc a thuilleadh mura mbeadh EUR 7 billiún faighte aige in iasachtaí arna ráthú ag an Stát. Mar sin féin, níor leor na hiasachtaí amháin chun an fhadhb a shárú gan

⁹ <https://www.insee.fr/fr/statistiques/5387891>

bearta breise a dhéanamh, amhail oibríochtaí a laghdú, an líonra intíre a athshainiú, agus feidhmeanna tacaíochta a shimpliú agus a chuíchóiriú (amhail margaíocht, cumarsáid, acmhainní daonna, etc.). Tháinig laghdú ar an bhfoireann de bharr na mbeart sin.

An tionchar a mheastar a bheidh ag na hiomarcaíochtaí ar an ngeilleagar áitiúil, réigiúnach nó náisiúnta, sin agus ar an bhfostaíocht

14. Is don réigiún Île de France is mó a ndearna na hiomarcaíochtaí in Air France difear ós rud é gur tharla 57 % de na hiomarcaíochtaí sa chríoch sin.
15. Míníonn údaráis na Fraince gur eascair meath an mhargaidh saothair in Île-de-France, amhail a tharla sa chuid eile den Fhrainc, ón ngéarchéim shláintíochta, agus go háirithe ón gcéad dianghlasáil (17 Márta go 10 Meitheamh 2020), ós beag nár tháinig stad ar an ngníomhaíocht eacnamaíoch lena linn.
16. Ag tús na mbeart pearsantaithe sa chéad ráithe de 2021, díreach tar éis na chéad sraithe dífhostuithe, ba é 7,7 % an ráta dífhostaíochta¹⁰ in Île de France. Bhí níos mó ná aon mhilliún (1 056 950) cuardaitheoirí poist cláraithe ann¹¹, sin méadú 8 % bliain ar bhliain. Tháinig méadú 9,2 % ar an líon cuardaitheoirí poist i gcás na bhfear agus méadú 6,7 % i gcás na mban¹². Bhí beagnach leath (49,8 %) den iomlán sin ina gcuardaitheoirí poist fadtéarmacha (níos mó ná 12 mhí), sin 4 pointe céatadáin (pp) níos airde ná mar a bhí in 2020 R1.
17. Tá feabhas tagtha ar staid na fostaíochta sa Fhrainc¹³ ó tharla na dífhostuithe sin agus ó cuireadh tús leis an tacaíocht. Tháinig laghdú 5,8 % ar an líon cuardaitheoirí poist in 2021 R4 bliain ar bhliain¹⁴, ach tá beagnach milliún cuardaitheoirí poist cláraithe in Île de France (994 110 in 2021 R4)¹⁵, d'ainneoin laghdú 6,1 % bliain ar bhliain¹⁶. Is ionann cuardaitheoirí poist fadtéarmacha agus 49,3 % den líon iomlán cuardaitheoirí poist (i.e. 1,2 pointe céatadáin níos mó ná 2020 R4¹⁷), d'ainneoin an laghdaithe faoi 3,9 % le linn na bliana.
18. Shonraigh riarachán saothair na Fraince go ndearna athstruchtúrú Air France difear don chóimheá fostaíochta sna críocha lenar bhain. Dá réir sin, thug sé fógra don fhiontar maidir leis na hoibleagáidí a bhí air ó thaobh athbheochan na fostaíochta sna críocha sin de. Ní mór don fhiontar gníomhaíochtaí a sholáthar amhail cúnamh fostaíochta díreach, cistiú le haghaidh staidéar a d'fhéadfaí a dhéanamh, ranníocaíocht airgeadais i gcistí frithpháirteacha le haghaidh athbheochana sa réigiún, etc¹⁸. gníomhaíochtaí a cheaptar chun gníomhaíochtaí eacnamaíocha úra a chur chun cinn agus chun poist a chruthú a chúiteodh na cinn a cailleadh.

¹⁰ <https://www.insee.fr/fr/statistiques/serie/001515843>

¹¹ [Cuardaitheoirí poist in Île de France 2021 R1](https://www.insee.fr/fr/statistiques/serie/001515843)

¹² Ibid

¹³ An Fhrainc lena n-áirítear na ranna agus na réigiúin Fhrancacha thar lear, gan Mayotte a áireamh.

¹⁴ [Demandeurs d'emploi inscrits à Pôle emploi au 4e trimestre 2021](https://www.insee.fr/fr/statistiques/serie/010597557)

¹⁵ <https://www.insee.fr/fr/statistiques/serie/010597557>

¹⁶ Táthar ag súil go bhfoilseofar faisnéis faoi chuardaitheoirí poist cláraithe in Île de France maidir le 2022 R1 an 28 Aibreán 2022.

¹⁷ https://idf.drieets.gouv.fr/sites/idf.drieets.gouv.fr/IMG/pdf/defm_ile-de-france_2021t4.pdf

¹⁸ <https://travail-emploi.gouv.fr/emploi-et-insertion/accompagnement-des-mutations-economiques/obligation-revitalisation-territoire>

Cur i bhfeidhm Chreat Cáilíochta an Aontais Eorpaigh um oirchill ar athrú agus ar athstruchtúrú (QFR)

19. Thug an Fhrainc tuairisc ar an gcaoi ar cuireadh san áireamh na moltaí a leagtar amach i gCreat Cáilíochta an Aontais Eorpaigh um oirchill ar athrú agus athstruchtúrú: de réir Chód Saothair na Fraince, aon chuideachta *in bonis* (i.e. cuideachta nach bhfuil faoi leachtú) a bhfuil 1 000 fostaí nó níos mó aici, is faoin gcuideachta sin atá sé costais iomlána na mbeart gníomhach maidir leis an margadh saothair a íoc le baill foirne a dífhostaíodh mar iarmhairt ar an athstruchtúrú eagraíochtúil. Ní fhoráiltear d'idirghníomhú ó údaráis phoiblí ach a mbeidh deireadh leis na bearta a chuireann an fiontar atá ag dífhostú ar fáil.
20. Tá sé curtha in iúl ag an bhFrainc go bhfuil pacáiste cuimsitheach de bhearta gníomhacha maidir leis an margadh saothair curtha ar bun ag Air France arb é is aidhm dó cúnaimh a thabhairt do na hoibrithe a leagadh as a bpost. I gcomhar le comhairleoireacht socrúcháin sheachtraigh (Alixio Mobilité and Sodesi), bhunaigh Air France pointe faisnéise treoraíochta (*Espaces d'information, d'accompagnement et de conseil*) ar an gcéad phointe teagmhála do na hoibrithe lena mbaineann. Ag an bpointe faisnéise seo, ní hamháin go bhfaigheann oibrithe treoraíocht maidir le deiseanna, ach tugtar cuidiú dóibh freisin lena n-iarrachtaí páirt a ghlacadh i mbearta oiliúna, nó fostaíocht nua a fháil.
21. Maidir leis na gníomhaíochtaí arna ndéanamh chun cúnaimh a thabhairt do na hoibrithe iomarcacha, tá sé curtha in iúl ag an bhFrainc gur tosaíodh ar chur i bhfeidhm na coda sin d'oibleagáid dhlíthiúil Air France a bhaineann le bearta gníomhacha maidir leis an margadh saothair láithreach tar éis na ndífhostuithe.

Comhlántacht maidir le gníomhaíochtaí atá á maoiniú ó chistí náisiúnta nó ó chistí an Aontais

22. Maidir leis na bearta a bhfuil tuairisc orthu thíos agus a gheobhaidh ranníocaíocht airgeadais ó CED, dheimhnigh an Fhrainc nach bhfaighidh siad ranníocaíochtaí airgeadais ó ionstraimí airgeadais eile de chuid an Aontais freisin.

Nósanna imeachta maidir le dul i gcomhairle leis na tairbhíthe ar a bhfuiltear ag díriú nó lena n-ionadaithe nó leis na comhpháirtithe sóisialta agus leis na húdaráis áitiúla agus réigiúnacha

23. Tá sé tugtha le fios ag an bhFrainc gur cuireadh an pacáiste comhordaithe de sheirbhísí pearsantaithe le chéile i gcomhairle le hionadaithe foirne agus ceardchumann. I sraith cruinnithe idir Air France agus SNPNC¹⁹, l'UNAC²⁰, l'UNSA-PNC²¹, CFDT²², FO²³, agus CFE/CGC²⁴, cheap na comhpháirtithe caibidlíochta an pacáiste beart chun cúnaimh leis na fostaíthe lena mbaineann.

¹⁹ Syndicat National du Personnel Navigant Commercial (Cumann Náisiúnta na bhFoirne Aeir Tráchtála)

²⁰ Union des Navigants de l'Aviation Civile (Cumann Náisiúnta na bhFoirne Eitlíochta Sibhialta)

²¹ Union Nationale des Syndicats Autonomes-Personnel Navigant Commercial (Cumann Náisiúnta na gCeardchumann Féinrialaitheach - Foireann Aeir Tráchtála)

²² Confédération Française Démocratique du Travail (Cónaidhm Dhaonlathach Saothair na Fraince).

²³ Confédération Générale du Travail - Force Ouvrière (An Chónaidhm Ghinearálta Saothair – Fórsa na nOibrithe).

²⁴ Confédération française de l'encadrement - Confédération générale des cadres (Cónaidhm Lucht Bainistíochta na Fraince – Cónaidhm Ghinearálta na mBainisteoirí)

Cuireadh tús leis na babhtaí caibidlíochta inmheánaí sin an 8 Iúil 2020 agus tháinig deireadh leo an 28 Bealtaine 2021²⁵.

Na tairbhíthe ar a bhfuiltear ag díriú agus na bearta atá beartaithe

Na tairbhíthe ar a bhfuiltear ag díriú

24. Táthar ag súil leis go nglacfaidh na hoibrithe iomarcacha uile páirt sna bearta. Is mar seo a leanas atá an miondealú a rinneadh ar na hoibrithe sin de réir inscne, aoisghrúpa, agus an leibhéil oideachais atá acu:

Catagóir		An líon tairbhíthe a bhfuil coinne leo	
Inscne:	Fir:	695	(44,0 %)
	Mná:	885	(56,0 %)
	Neamh-dhénártha	0	(0,0 %)
Aoisghrúpa:	Faoi bhun 30 bliain:	21	(1,3 %)
	30-54 bliana:	1 073	(67,9 %)
	Os cionn 54 bliana:	486	(30,8 %)
Leibhéal oideachais	Oideachas meánscoile íochtaráí nó níos lú ²⁶	65	(4,1 %)
	Oideachas meánscoile uachtaráí ²⁷ nó oideachas iar-mheánscoile ²⁸	1 051	(66,5 %)
	Oideachas treasach ²⁹	464	(29,4 %)

25. Tá 96 n-oibrí ann atá faoi mhíchumas.

Na bearta atá beartaithe

26. Na bearta dá n-iarrann údaráis na Fraince cómhaoiniú ó CED, baineann siad le síneadh a chur leis an tréimhse saoire ath-implonaithe ('congé de reclassement')³⁰

²⁵ Caibidlíochtaí in Air France ón 8 Iúil 2020 go dtí an 18 Nollaig 2020, in Hop ón 20 Aibreán 2021 go dtí an 28 Bealtaine 2021 agus in Hop Training ón 28 Eanáir 2021 go dtí an 25 Márta 2021.

²⁶ ISCED 0-2

²⁷ ISCED 3

²⁸ ISCED 4

²⁹ ISCED 5-8

³⁰ Maidir leis an tsaoire ath-implonaithe ('congé de reclassement'), le hAirteagal L1233-71 de Chód Saothair na Fraince, déantar foráil maidir le cuideachta a bhfuil breis agus míle duine fostaithe aici, go gceanglaítear ar an gcuideachta sin na bearta a leagtar amach ann a thairiscint ar feadh tréimhse 4 mhí ar a laghad. Dá bhrí sin, de réir na reachtaíochta thuasluaite, tá an tréimhse dar tús an cúigiú mí

thar an oibleagáid dhlíthiúil atá ar an bhfiontar. Is le haghaidh oibríthe a dífhostaíodh atá an beart sin ceaptha, sin agus le haghaidh oibríthe nach raibh, tráth a d'fhág siad an fhostaíocht dá dtoil féin, pleananna ath-implonaithe beachta acu go fóill agus ar mhian leo leas a bhaint as bearta athoiliúna, comhairle, treoraíocht nó cúnamh chun gnólacht a bhunú nó a ghlacadh ar láimh.

27. Seo a leanas na bearta atá i gceist leis na seirbhísí pearsantaithe a sholáthrófar do na hoibríthe iomarcacha:

- Seirbhísí comhairleacha agus treoir ghairme: Tabharfar treoir ghairme do na hoibríthe a leagadh as a bpost agus tabharfar cúnamh dóibh ina gcuardach poist, nó tabharfar treoir maidir le gnólachtaí nuathionscanta dóibh sa chás go bhfuil sé d'aidhm acu a ngnó féin a thosú. Gheobhaidh na rannpháirtithe comhairleoireacht agus treoir ghairme, tacaíocht sa chuardach post, faisnéis faoin oiliúint atá ar fáil, agus moltaí ar son na fiontraíochta. Faoin mbeart sin, cuirfear deiseanna socrúcháin sheachtraigh ar fáil d'oibríthe, deiseanna a eascraíonn as cuardach gníomhach poist a dhéanfaidh speisialtóirí, agus cuideofar leo tairiscintí poist a roghnú, iad féin a ullmhú le haghaidh agallamh, etc. Cabhróidh comhairleoirí speisialaithe leis na hoibríthe arb í an fhéinfhostaíocht, táthcheangal gnó nó cruthú gnó an aidhm atá acu, phlean gnó a tharraingt suas, maoiniú agus seirbhísí tionlacain eile i dtreo na fiontraíochta a chuardach.
- Oiliúint: Tairgfear réimse cúrsaí oiliúna uas-scilithe agus athscilithe do na hoibríthe a bheidh saincheaptha dá riachtanais, de réir mar a shaináithneoidh na comhairleoirí a sholáthróidh na seirbhísí comhairleacha iad. Na hoibríthe arb í an fhéinfhostaíocht an aidhm atá acu, tairgfear oiliúint i dtreo cruthú gnó dóibh, oiliúint a chuirfidh Sodesi (PASS CREA), an Comhlachas Tráchtála agus Tionscail, nó an Comhlachas Trádála agus Ceardaíochta ar fáil.
- Ranníocaíocht chun gnólacht a chruthú. Na hoibríthe a thionscnaíonn a ngnó féin (táthcheangal gnó nó tionscnamh gnó), gheobhaidh siad suas le EUR 15 000 chun costais tionscanta, infheistíocht i sócmhainní agus costais reatha a chumhdach. Íocfar an ranníocaíocht i dtrí thráthchuid bunaithe ar gharspriocanna réamhshainithe a bhaint amach. Íocfar an chéad thráthchuid de EUR 3 000 chomh luath agus a thabharfar cruthúnas a thionscanta nó cruthúnas gnó a bheith glactha ar láimh acu, amhail admháil an chlárúcháin³¹. Is é sin, dara agus tríú thráthchuid de EUR 6 000 an duine, tar éis an chéad ráitis gníomhaíochta agus an dara ráiteas gníomhaíochta a thíolacadh don *Régime Social des Indépendants*³², ina léireofaí láimhdeachas de EUR 200 agus de EUR 500 ar a laghad faoi seach do dhaoine féinfhostaithe agus do dhílseánaigh aonair; nó ar dheimhniú arna eisiúint ag cuntasóir cairte a thíolacadh, ina

roghnach agus féadfaidh sí a bheith faoi réir ranníocaíocht ó CED i gcomhréir le hAirteagal 9(1) de Rialachán (AE) 2021/691. Tá sé beartaithe ag Air France an beart sin a thairiscint ar feadh tréimhse suas le 12 mhí. Forlíontar an 12 mhí le trí mhí bhreise d'oibríthe sinsearachacha (iad siúd a rugadh roimh an 1 Eanáir 1965), d'oibríthe faoi mhíchumas, agus d'oibríthe a bhfuil leibhéal ísle ghairme acu (N1 agus N2 i rangú post Air France). San iarratas, ní dhéantar foráil maidir le haon ranníocaíocht le haghaidh na chéad cheithre mhí den tsaoire ath-implonaithe, tréimhse a fhreagraíonn don íostréimhse a shonraítear sa dlí.

³¹ Clárú i gclár SIRENE nó sa Chlár Trádála agus Cuideachtaí (RCS).

³² Régime Social des Indépendants (scéim shóisialta le haghaidh daoine féinfhostaithe).

léireofaí láimhdeachas de EUR 500 agus EUR 1 000 ar a laghad faoi seach le haghaidh fiontar³³.

- Sochair a ghabhann leis an bhfriliú Na FBManna a fhostaíonn iar-oibrí Air France ar chonradh buan nó ar chonradh ar théarma seasta 6 mhí ar a laghad, gheobhaidh siad suas le dhá mhí de phá agus de ranníocaíochtaí fostóra, agus cuid de chostais na hoiliúna chun dul in oiriúint don phost nua, dá mba ghá an oiliúint sin.
 - Liúntas athfhostaíochta gasta. Na hoibrithe a fhilleann go gasta ar an bhfostaíocht trí chonradh buan nó sealadach de shé mhí ar a laghad, gheobhaidh siad liúntas is cothrom leis an liúntas cuardaigh poist³⁴ a gheobhaidís mura bhfaighidís an post. Ní fhéadfaidh an méid sin a bheith níos mó ná 4 mhí den liúntas cuardaigh poist.
 - Méaduithe ar thuarastal. Is é is aidhm don bheart sin dreasacht a thabhairt chun glacadh le fostaíocht nua (tréimhse bhuan nó téarma seasta de shé mhí ar a laghad), fiú más lú tuarastal na fostaíochta nua ná tuarastal an phoist roimhe sin. Beidh an liúntas comhionann leis an difríocht idir tuarastail suas le EUR 600 in aghaidh na míosa ar feadh uastréimhse 30 mí³⁵, nó suas le EUR 375³⁶ in aghaidh na míosa ar feadh uastréimhse 48 mí³⁷. In aon chás, ní fhéadfaidh an méid iomlán in aghaidh an oibrí a bheith níos mó ná EUR 18 000.
28. Is ionann na gníomhaíochtaí atá beartaithe, a bhfuil tuairisc orthu anseo, agus bearta gníomhacha maidir leis an margadh saothair laistigh de na gníomhaíochtaí incháilithe a leagtar amach in Airteagal 7 den Rialachán maidir leis an gCiste Eorpach um Choigeartú don Domhandú. Ní chuirfear na gníomhaíochtaí sin in ionad bearta éighníomhacha cosanta sóisialta.
29. Thug Air France le fios go gcuireann Selecta cúrsaí oiliúna ar fáil go tráthrialta dá fhoireann, cúrsaí ina dtugtar aird ar scileanna digiteacha agus ar scileanna a theastaíonn i ngeilleagar atá tíosach ar acmhainní, mar chuid dá phlean chun scileanna a fhorbairt. Beidh an oiliúint arna cur ar fáil ar ardáin oiliúna dhigiteacha Air France ar fáil do na hoibrithe iomarcacha fad a bheidh siad rannpháirteach i mbearta CED.
30. Sholáthair an Fhrainc an fhaisnéis a theastaíonn maidir le bearta atá éigeantach don fhiontar lena mbaineann de bhua an dlí náisiúnta nó de bhun comhaontuithe comhchoiteanna. Dheimhnigh sí nach dtiocfadh ranníocaíocht airgeadais ó CED in ionad na mbeart sin.

Buiséad measta

31. Is é EUR 20 873 656 na costais mheasta iomlána, méid a chuimsíonn caiteachas ar sheirbhísí pearsantaithe amháin. Chinn an Fhrainc caiteachas ar ghníomhaíochtaí

³³ Cuideachta theoranta (LLC), cuideachta phoiblí theoranta (PLC), etc.

³⁴ Ríomhtar an liúntas cuardaigh poist mar 70 % de mheán na 12 tuarastal dheireanacha roimh an iomarcaíocht.

³⁵ Suas le 36 i gcás oibrithe iomarcacha i gcríocha eile seachas Île de France agus a bhfuil an post nua atá acu lasmuigh de Île de France freisin.

³⁶ Suas le EUR 450 i gcás oibrithe iomarcacha i gcríocha eile seachas Île de France agus a bhfuil an post nua atá acu lasmuigh de Île de France freisin.

³⁷ Níl méaduithe ar thuarastal lasmuigh den tréimhse cur chun feidhme incháilithe do chómhaoiniú ó CED.

ullmhúcháin, bainistíochta, faisnéise agus poiblíochta, rialúcháin agus tuairiscithe a chumhdach lena hacmhainní féin.

32. Is é EUR 17 742 607 (85 % de na costais iomlána) an ranníocaíocht airgeadais iomlán a iarradh ar CED.

33. Is é Air France a sholáthraíonn an réamh-mhaoiniú agus an cómhaoiniú náisiúnta.

Bearta	An líon measta rannpháirtithe	An costas measta in aghaidh an rannpháirtí (EUR) ³⁸	Costais mheasta iomlána (EUR) ³⁹
Seirbhísí pearsantaithe (bearta faoi Airteagal 7(2)(a) de Rialachán CED)			
Seirbhísí comhairleacha agus treoir ghairme (<i>accompagnement congé de reclassement Alixio et Sodesi</i>)	1 162	2 098	2 437 820
Oiliúint (<i>formation</i>)	805	2 815	2 266 400
Ranníocaíocht chun gnólachtaí a chruthú (<i>prime à la création d'entreprise</i>)	591	15 000	8 865 000
Fo-iomlán (a): An céatadán den phacáiste de sheirbhísí pearsantaithe	–		13 569 220 (65,00 %)
Liúntais agus dreasachtaí (bearta faoi Airteagal 7(2)(b) de Rialachán CED)			
Sochair a ghabhann leis an bhfriliú (<i>aide TPE - PME</i>)	46	5 296	243 608
Liúntas athfhostaíochta gasta (<i>indemnité de reclassement rapide/immédiat</i>)	512	11 467	5 871 235
Méaduithe ar thuarastal (<i>indemnité différentielle de rémunération</i>)	83	14 332	1 189 593
Fo-iomlán (b): An céatadán den phacáiste de sheirbhísí pearsantaithe:	–		7 304 436 (35,00 %)
Gníomhaíochtaí faoi Airteagal 7(5) de Rialachán CED			
1. Gníomhaíochtaí ullmhúcháin	–		0
2. Bainistíocht	–		0
3. Faisnéis agus poiblíocht	–		0

³⁸ Chun deachúlacha a sheachaint, slánaítear na costais mheasta in aghaidh an rannpháirtí. Mar sin féin, ní dhéanann an slánú aon dífeor do chostas iomlán gach birt, arae tá sé sin fós mar a shonraítear san iarratas a chuir an Fhrainc isteach.

³⁹ Mar gheall ar an slánú, ní réitíonn na suimeanna iomlána le chéile.

4. Rialú agus tuairisciú	–	0
Fo-iomlán (c): An céatadán de na costais iomlána:	–	0 (0,00 %)
Costais iomlána (a + b + c):	–	20 873 656
Ranníocaíocht ó CED (85 % de na costais iomlána)	–	17 742 607

34. Costais na mbeart atá sainaitheanta sa tábla thuas mar bhearta faoi Airteagal 7(2)(b) de Rialachán CED, ní mó iad ná 35 % de na costais iomlána don phacáiste comhordaithe de sheirbhísí pearsantaithe. Dheimhnigh an Fhrainc go ngabhann coinníoll leis na bearta sin, eadhon nach mór do na tairbhíthe ar a bhfuiltear ag díriú a bheith rannpháirteach go gníomhach i ngníomhaíochtaí cuardaigh poist nó i ngníomhaíochtaí oiliúna.
35. Dheimhnigh an Fhrainc nach rachadh costais na n-infheistíochtaí le haghaidh féinfhostaíochta, gnólachtaí nuathionscanta agus táthcheangail ag fostaithe thar EUR 22 000 in aghaidh an tairbhí.

Tréimhse incháilitheachta an chaiteachais

36. An 1 Feabhra 2021, thosaigh an Fhrainc ag soláthar na seirbhísí pearsantaithe do na tairbhíthe ar a bhfuiltear ag díriú. Dá bhrí sin, an caiteachas ar na bearta, is caiteachas é a bheidh incháilithe le haghaidh ranníocaíocht airgeadais ó CED ón 1 Feabhra 2021 go dtí 24 mhí tar éis an dáta a thiocfaidh an Cinneadh Maoiniúcháin i bhfeidhm.
37. Thosaigh an Fhrainc ag tabhú an chaiteachais riaracháin chun CED a chur chun feidhme an 6 Eanáir 2021, ach chinn sí é a chumhdach lena hacmhainní féin.

Córais bhainistíochta agus rialaithe

38. Tá tuairisc san iarratas ar an gcóras bainistíochta agus rialaithe lena sonraítear freagrachtaí na gcomhlachtaí lena mbaineann. Thug an Fhrainc fógra don Choimisiún go ndéanfadh an Délégation générale à l'emploi et à la formation professionnelle (DGEFP) san Aireacht Saothair, Fostaíochta, Gairmoiliúna agus Idirphlé Shóisialta, an ranníocaíocht a bhainistiú, go sonrath an t-aonad Fonds national de l'emploi (DGEFP - MFNE). Is é an t-aonad Affaires financières (DGEFP - MAFI) laistigh den DGEFP a dhéanfaidh na híocaíochtaí. Is é Commission interministérielle de coordination des contrôles (CICC) údarás iniúchóireachta na Fraince le haghaidh CED. Is é Air France a bheidh freagrach as cur chun feidhme na mbeart. I ndáil leis sin, tabharfaidh údaráis na Fraince comhaontú comhpháirtíochta i gcrích le Air France.

Na gealltanais a thug an Ballstát lena mbaineann

39. Chuir an Fhrainc na dearbhuithe uile ar fáil a bhfuil gá leo maidir leis na nithe seo a leanas:
- cloífead leis na prionsabail um chóir chomhionann agus neamh-idirdhealú sa rochtain ar na bearta atá beartaithe agus i gcur chun feidhme na mbeart sin,
 - comhlíonadh na ceanglais a leagtar síos sa dlí náisiúnta agus i ndlí an Aontais maidir le hiomarcaíochtaí comhchoiteanna,

- maidir le Air France, a lean lena ghníomhaíochtaí tar éis dó na daoine lena mbaineann a leagan as, rinne sé a chuid oibleagáidí dlíthiúla a chomhlíonadh agus riar sé dá chuid oibríthe dá réir,
- beidh cosc ar aon mhaoiniú dúbailte,
- cloífidh an ranníocaíocht airgeadais ó CED le rialacha nós imeachta agus le rialacha ábhartha an Aontais maidir le státchabhair.

IMPLEACHT BHUISÉADACH

Togra buiséadach

40. Ní rachaidh CED thar uasmhéid bliantúil EUR 186 milliún (i bpraghsanna 2018), mar a leagtar síos in Airteagal 8 de Rialachán (AE, Euratom) 2020/2093 ón gComhairle an 17 Nollaig 2020 lena leagtar síos an creat airgeadais ilbhliantúil do na blianta 2021 go 2027⁴⁰.
41. Tar éis dó an t-iarratas a scrúdú i dtaca leis na coinníollacha a leagtar amach in Airteagal 13(1) agus (2) de Rialachán CED, agus tar éis dó an líon tairbhíthe ar a bhfuiltear ag díriú, na bearta atá beartaithe agus na costais mheasta a chur san áireamh, molann an Coimisiún EUR 17 742 607 a shlógadh as CED, sin 85 % de chostais iomlána na mbearta atá beartaithe, chun ranníocaíocht airgeadais a sholáthar don iarratas.
42. Maidir le CED a shlógadh, is iad Parlaimint na hEorpa agus an Chomhairle i gcomhpháirt le chéile a dhéanfaidh an cinneadh atá beartaithe, mar a leagtar síos i bpointe 9 de Chomhaontú Idirinstitiúideach an 16 Nollaig 2020 idir Parlaimint na hEorpa, Comhairle an Aontais Eorpaigh agus an Coimisiún Eorpach maidir le smacht buiséadach, comhar i gcúrsaí buiséadacha agus bainistiú fóna an airgeadais, mar aon le hacmhainní dílse nua, lena n-áirítear treochlár maidir le hacmhainní dílse nua a thabhairt isteach⁴¹.

Gníomhartha gaolmhara

43. An tráth céanna a thíolacfaidh sé an togra seo le haghaidh cinnidh CED a shlógadh, déanfaidh an Coimisiún togra a thíolacadh do Pharlaimint na hEorpa agus don Chomhairle le EUR 15 645 511a aistriú go dtí an líne buiséadach iomchuí⁴².
44. An tráth céanna a ghlac sé an togra seo le haghaidh cinnidh CED a shlógadh, ghlac an Coimisiún cinneadh maidir le ranníocaíocht airgeadais arb é atá ann cinneadh

⁴⁰ IO L 433, 22.12.2020, lch. 11.

⁴¹ IO L 433, 22.12.2020, lch. 29.

⁴² Arna iarraidh sin don Fhrainc, an ranníocaíocht airgeadais a íocadh ó CED chun bearta gníomhacha maidir leis an margadh saothair a mhaoiniú tar éis iomarcaíochtaí in Selecta, bhí an ranníocaíocht sin ní b'ísle ná an méid a cuireadh ar fáil sa Chinneadh ó Pharlaimint na hEorpa agus ón gComhairle dar dáta an 24 Márta 2022 (EUR 4 074 296). Chuir an Fhrainc an Coimisiún ar an eolas go bhféadfaí 107 n-iomarcaíocht atá beartaithe do mhí Eanáir 2022 a sheachaint a bhí leis an téarnamh eacnamaíoch iar-COVID. Dá bhrí sin, laghdaigh an Fhrainc an méid a bhí ag teastáil ó CED chun cúnamh a thabhairt d'oibríthe iomarcacha Selecta. Is é EUR 1 977 200 an tsuim sin anois. Ós rud é go bhfuil EUR 2 097 096 de leithreasáil faoi chomhair gealltanais fós le fáil ar an líne oibríochtaí tar éis na híocaíochta leis an bhFrainc, ní gá don Choimisiún méid iomlán na ngealltanais le haghaidh Air France a aistriú ón líne chúltaca.

maoiniúcháin de réir bhrí Airteagal 110 den Rialachán Airgeadais⁴³. Tiocfaidh an cinneadh maoiniúcháin sin i bhfeidhm an dáta a fhaigheann an Coimisiún fógra faoi fhormheas an aistriúcháin bhuiséadaigh ag Parlaimint na hEorpa agus ag an gComhairle.

⁴³ Rialachán (AE, Euratom) 2018/1046 ó Pharlaimint na hEorpa agus ón gComhairle an 18 Iúil 2018 maidir leis na rialacha airgeadais is infheidhme maidir le buiséad ginearálta an Aontais, lena leasaítear Rialachán (AE) Uimh. 1296/2013, (AE) Uimh. 1301/2013, (AE) Uimh. 1303/2013, (AE) Uimh. 1304/2013, (AE) Uimh. 1309/2013, (AE) Uimh. 1316/2013, (AE) Uimh. 223/2014, (AE) Uimh. 283/2014, agus Cinneadh Uimh. 541/2014/AE agus lena n-aisghairtear Rialachán (AE, Euratom) Uimh. 966/2012 (IO L 193, 30.7.2018, lch. 1).

Togra le haghaidh

CINNEADH Ó PHARLAIMINT NA hEORPA AGUS ÓN gCOMHAIRLE

maidir le slógadh an Chiste Eorpaigh um Choigeartú don Domhandú d'Oibrithe Iomarcacha tar éis iarratas ón bhFrainc – EGF/2022/001 FR/Air France

TÁ PARLAIMINT NA hEORPA AGUS COMHAIRLE AN AONTAIS EORPAIGH,

Ag féachaint don Chonradh ar Fheidhmiú an Aontais Eorpaigh,

Ag féachaint do Rialachán (AE) 2021/691 ó Pharlaimint na hEorpa agus ón gComhairle an 28 Aibreán 2021 maidir leis an gCiste Eorpach um Choigeartú don Domhandú d'Oibrithe Iomarcacha (CED) agus lena n-aisghairtear Rialachán (AE) Uimh. 1309/2013⁴⁴, agus go háirithe Airteagal 15(1) de,

Ag féachaint do Chomhaontú Idirinstitiúideach an 16 Nollaig 2020 idir Parlaimint na hEorpa, Comhairle an Aontais Eorpaigh agus an Coimisiún Eorpach maidir leis an smacht buiséadach, le comhar in ábhair bhuiséadacha agus le bainistíocht fhóna airgeadais, agus maidir le hacmhainní dílse nua, lena n-áirítear treochlár i dtreo acmhainní dílse nua a thabhairt isteach⁴⁵, agus go háirithe pointe 9 de,

Ag féachaint don togra ón gCoimisiún Eorpach,

De bharr an mhéid seo a leanas:

- (1) Is é is aidhm don Chiste Eorpach um Choigeartú don Domhandú d'Oibrithe Iomarcacha (CED) dlúthpháirtíocht a léiriú agus fostaíocht chuibhiúil inbhuanaithe a chur chun cinn san Aontas trí thacaíocht a thabhairt d'oibrithe a cuireadh ar iomarcaíocht agus do dhaoine féinhostaithe a bhfuil deireadh tagtha lena ngníomhaíocht i gcás mórtheagmhais athstruchtúraithe, sin agus cúnamh a thabhairt dóibh filleadh ar fhostaíocht chuibhiúil inbhuanaithe a luaithe is féidir.
- (2) Ní rachaidh CED thar uasmhéid bliantúil EUR 186 milliún (i bpraghsanna 2018) mar a leagtar síos in Airteagal 8 de Rialachán (AE, Euratom) 2020/2093 ón gComhairle⁴⁶.
- (3) An 21 Eanáir 2022, chuir an Fhrainc iarratas isteach chun CED a shlógadh, iarratas i leith iomarcaíochtaí oibrithe in Air France sa Fhrainc. Bhí faisnéis bhreise ann mar fhorlónadh ar an iarratas sin, faisnéis a soláthraíodh i gcomhréir le hAirteagal 8(5) de Rialachán (AE) 2021/691. Comhlíonann an t-iarratas sin na coinníollacha maidir le ranníocaíocht airgeadais ó CED, coinníollacha a leagtar síos in Airteagal 13 de Rialachán (AE) 2021/691.
- (4) Dá bhrí sin, ba cheart CED a shlógadh chun ranníocaíocht airgeadais EUR 17 742 607 a sholáthar i leith an iarratais a chuir an Fhrainc isteach.

⁴⁴ IO L 153, 3.5.2021, lch. 48.

⁴⁵ IO L 433, 22.12.2020, lch. 29.

⁴⁶ Rialachán (AE, Euratom) 2020/2093 ón gComhairle an 17 Nollaig 2020 lena leagtar síos an creat airgeadais ilbhliantúil do na blianta 2021 go 2027 (IO L 433 I, 22.12.2020, lch. 11).

- (5) Chun íoslaghdú a dhéanamh ar an am a theastaíonn chun CED a shlógadh, ba cheart feidhm a bheith ag an gcinneadh seo ón dáta a ghlactar é,

TAR ÉIS AN CINNEADH SEO A GHLACADH:

Airteagal 1

Faoi chuimsiú bhuiséad ginearálta an Aontais le haghaidh na bliana airgeadais 2022, déanfar an Ciste Eorpach um Choigeartú don Domhandú d'Oibrithe Iomarcacha a shlógadh chun méid EUR 17 742 607 a sholáthar ina leithreasuithe i gcomhair gealltanais agus ina leithreasuithe íocaíochta.

Airteagal 2

Tiocfaidh an Cinneadh seo i bhfeidhm lá a fhoilsithe in Iris Oifigiúil an Aontais Eorpaigh. Beidh feidhm aige ón *[dáta a ghlactha]**

Arna dhéanamh sa Bhruiséil,

*Thar ceann Pharlaimint na hEorpa
An tUachtarán*

*Thar ceann na Comhairle
An tUachtarán*

* An dáta le cur isteach ag an bParlaimint sula bhfoilsítear san IO é.